


Stór hluti af löggjöf á sviði fjármálamarkaðar á rætur að rekja til tilskipana og reglugerða sem Evrópusambandið samþykkir og eru svo teknar upp í EES-samninginn. Árið 2018 hafði safnast upp mikill fjöldi gerða sem hafði tekið gildi í Evrópusambandinu en ekki verið tekinn upp í EES-samninginn (upptökuhalli). Það ár var umtalsverður hluti þeirra gerða tekinn upp í samninginn. Það varð aftur á móti til þess að EES-gerðum sem átti eftir að innleiða í íslenska löggjöf (innleiðingarhalli) fjölgaði verulega. Síðustu misseri hefur tekist að ganga verulega á þann halla eins og sést á eftirfarandi mynd.



Í áætluninni er greint frá því hvernig fjármála- og efnahagsráðuneytið áformar að forgangsraða vinnu við þær móðurgerðir sem eftir standa eða fyrirséð er að verði teknar upp í EES-samninginn.

Í 1. forgangi í áætluninni eru gerðir sem hafa þegar verið teknar upp í samninginn. Gerðirnar snúa að eftirtöldu: því að lánastofnanir og verðbréfafyrirtæki séu nógu vel fjármögnuð til að takast á við áföll, því að auðvelda sölu sjóða þvert á landamæri innan Evrópska efnahagssvæðisins og að starfstengdum eftirlaunasjóðum. Ráðgert er að lokið verði við innleiðingu gerðanna á þessu ári og í upphafi næsta árs.

Í 2. forgangi eru gerðir sem hafa ekki verið teknar upp í EES-samninginn en eru komnar nokkuð á veg í upptöku. Gerðirnar snúa að eftirtöldu: að ramma fyrir staðlaða verðbréfun (sem er þegar lánum eða öðrum eignum er safnað saman í eignasöfn sem mynda grundvöll fyrir útgáfu verðbréfa), að greiðslum yfir landamæri innan Evrópska efnahagssvæðisins, að því hvernig tekið skuli á erfiðleikum miðlægra mótaðila í afleiðuviðskiptum, að samevrópskum lífeyrissparnaði, innviðum fyrir dreifðar færsluskrár á fjármálamarkaði, hópfiármögnun, stafrænum viðnámsþrótti fjármálageirans, evrópskum

eftirlitsstofnunum á fjármálamarkaði, starfsleyfum fyrir veitendur gagnaskýrslubjónustu og varfærniskröfum til verðbréfafyrirtækja. Áformað er að ljúka við innleiðingu gerðanna á næsta og þarnæsta ári.

Í 3. forgangi eru gerðir sem hafa ekki verið teknar upp í EES-samninginn og eru komnar skammt á veg í upptöku. Ekki hefur verið mörkuð tímalína fyrir innleiðingu þeirra.

Nánari upplýsingar um hverja gerð í EES-gagnagrunni stjórnvalda má nálgast með því að smella á heiti hennar í áætluninni.